

# PAGTULON-AN 10 – ANG PAG-AGI UG PAGSULOD SA DALAN SA SAAD

## Exodo 1 - 14

**TEMA:** Pagtudlo sa pagkahingpit sa kaluwasan diha kang Cristo.

Magapakaaaron-ingnon kita sa pila ka gutlo. Pananglitan ang imong nasud anaa sa pagpakiggubat! Ang kaaway nagpadala ug daghang mga eroplano nga dunay mga bomba ibabaw sa imong balay. Nakita nimo sila nga nagsingabut, usa ka mga dakung panon sa mga eroplano. Magasugod ikaw sa pag-ampo nga unta molabay lang sila nga dili manghulog sa ilang mga bomba. Sa dihang buhaton kana nila, luwas ka! Ang kamatayon dili muabut kanimo gikan sa kahanginan.

Karon sa atong pagpanaw, atong makat-onan giunsa sa Dios pagluwas ang Iyang katawhan; gikan sa tulo (3) ka matang sa kamatayon samtang sila nagapanaw sa DALAN SA SAAD. Ang pagtapus sa ulahing pagtulon-an nagabilin kanato didto sa Egipto human sa kamatayon ni Israel ug Jose. Samtang si Jose anaa pa sa gahum, ang tanan maayo alang sa mga anak sa Israel; apan human sa daghang mga katuigan ang lahi nga Paraon miabut sa paghari. Ug tungod sa kahadlok sa nagkadaghan nga mga Israelitas, misugod siya sa pagdaugdaug kanila ug nagahimo kanila nga ulipon, Exodo 1:8-22.

Sa dihang misamot ang pagdaugdaug kanila nga dili na nila halos maantus, sila mitawag sa Dios, Exodo 2:23-25. Ang Dios nakadungog sa ilang mga pag-agulo ug mitawag ug sa usa ka Israelita nga ginganlan ug Moises, aron sa pagpangulo sa Iyang katawhan pagpagawas gikan sa Egipto; ngadto sa yuta nga gisaad sa Dios nga ihatag ngadto kang Abraham, Isaac ug Jacob. Gitawag kini nato nga YUTA SA SAAD. Si Moises mipakita ug pagduhaduha sa dihang siya gihatagan sa Dios sa maong sugo. Ug sa katapusan, ang Dios nasuko ug gihatag si Aaron ingon tigpamaba ni Moises sa atubangan ni Paraon, Exodo 3:4-16. Uban sa gahum sa Dios, si Moises makahimo ug mga kahibulongan aron nga tugotan ni Paraon ang Israelitas, ang panganay nga anak sa Dios, nga mopahawa sa Egipto aron mag-alagad Kaniya, Exodo 4:21-23. Si Moises nagpangidaron ug otsenta (80) katuig ug si Aaron otsentay tres (83) katuig, sa dihang misulti sila ni Paraon. Mabasa nato ang kulbahinam nga kasaysayan sa mga kagul-anan ug pag-indigay sa Exodo 7:8-11:10. Ang Dios naghimo ug kalainan sa mga Egiptohanon ug mga Israelitas apan bisan pa niining tanan, si Paraon wala gihapon motugot nga mobiya ang mga Israelitas sa Egipto.

Ang Dios mihatag kang Moises ug Aaron sa plano alang sa pag-ihaw sa Karnero sa Pascua (Pass-over Lamb), sumala sa gisulti sa Exodo kapitulo 12. Ang tanang pamilyang Israelitas maga-ihaw sa karnero nga laki nga walay daut ug ibutang ang dugo niini sa duha ka haligi ug balabag sa pultahan sa mga balay, diin sila magakaon sa unod sa karnero. Ang dugo mao ang ilhanan alang kanila diha sa ilang mga balay aron maluwat sila. Ug tungod kay kon diin walay dugo, *ang tanang panganay pagapatyon sa grupo sa mga manolunda nga magalaglag*, Salmo 78:49-50.

Ngano nga ang Dios nagasulti sa mga anak sa Israel sa pagbutang ug dugo sa pultahan sa ilang mga balay? Tungod kay ang haligi ug balabag sa pultahan mao lamang ang bahin sa balay nga gihimo sa bato ug dinhi niini nasulat ang mga ngalan sa nagapuyo. Bisan pa kon ang balay maguba, daku ang kahigayonan nga ang mga pangalan magapabilin sa paglungtad sa bato. Busa gikinahanglan sa Dios nga ang mga Israelitas sa pagbutang sa dugo sa ibabaw sa mga haligi ug mga balabag sa pultahan, Siya nagasulti kanila sa pagtabon sa ilang mga ngalan uban sa mga dugo sa nating karnero. Pinaagi sa pagbuhat niini, sila gitudloan sa mga prinsipyo sa kaluwasan. Ang ilang mga ngalan diha sa bato dili sa pagsiguro sa kinabuhi human dinhi, sama sa mga Ehiptoanong pagtoo; kondili pinaagi lamang sa dugo sa Cordero nga maoy makahimo niana.

Kita usab kinahanglan makatuon sa samang pagtulon-an. Mahinungdanon kaayo kon asa nasulat ang atong mga ngalan. “Ug kon ang ngalan ni bisan kinsa dili makaplagaan nga nahisulat sa basahon sa kinabuhi, siya itambog ngadto sa linaw nga kalayo,” Pinadayag 20:15. Kini nga basahon gitawag nga ‘basahon sa kinabuhi sa Cordero,’ Pinadayag 21:27. Aron masulat ang imong ngalan sa maong basahon; kinahanglan ka motoo nga ikaw aduna lamay kaluwasan diha kang Cristo, pinaagi sa Iyang dugo, kapasayloan sa atong mga sala, sumala sa kadagaya sa Iyang grasya, Efeso 1:7.


Sa tungang gabii, ang Ginoong Dios mipatay sa tanang panganay sa yuta sa Egipto. Gikan sa panganay ni Paraon kinsa nagalingkud sa trono ngadto sa mga panganay sa mga binihag nga atua sa bilangoan, ug ang tanang panganay sa kahayupan. Niadtong gabhiona didto sa Egipto, ang kamatayon miabut sa tanang mga balay ug dihay mga pagminatay sa tibuok yuta. Si Paraon mibangon sa kagabhion ug misulti kang Moises ug Aaron sa pagbiya kauban ang tanang mga Israelitas, uban sa ilang mga kahayupan. Sumala sa pulong ni Moises, ang mga Israelitas nangayo sa mga Egiptoanong ug mga butang nga salapi ug mga butang nga bulawan ug mga sinina. Ug ang Dios mihatag sa mga tawo ug kahamuot sa panan-aw sa mga Egiptoanong ug mihatag sila sumala sa ilang gipangayo. Ug ilang gihurot pagkuha ang mga butang sa mga Egiptoanong.

Samtang wala pa makalakaw ug halayo ang mga Israelitas, si Paraon nag-usab sa iyang hunahuna ug ang iyang mga kasundalohan misugod sa pag-apas kanila. Sa atubangan sa mga Israelitas mao ang Dagat nga Mapula, diin dili sila makatabok ngadto sa pikas tampi. Apan si Moises misulti sa mga tawo, “Ayaw kamo kahadlok, pagbarug kamo ug tan-awa ang kaluwasan ni Jehovah...si Jehovah ang magapakig-away alang kaninyo, Exodo 14:13-14. Ug gituy-od ni Moises ang iyang kamot ibabaw sa dagat, ug gibuhat ni Jehovah ang pag-iway sa dagat pinaagi sa kakusog sa hangin sa silangan sa tibuok gabii ug nahimo ang dagat nga yutang mamala ug ang mga tubig nabahin ug ang mga anak sa Israel misulod sa taliwala sa dagat sa yutang mamala, ug nahimo ang mga tubig nga ingon sa paril sa ilang tuo ug sa ilang wala, Exodo 14:21,22.

Ang mga sundalo nga migukod kanila nakatabok ba nga luwas ngadto sa pikas tampi? Wala, naghunahuna sila nga makalabang sila sa dagat; apan silang tanan nangalumos didto.

Ang mga Israelitas madaugong naluwas gikan sa tulo (3) ka matang sa kamatayon: (1) gikan sa grupo sa molaglag nga mga manolunda; (2) gikan sa dagat; (3) ug gikan sa mga sundalo ni Paraon.

Kining tanan gihimo sa Dios pinaagi sa Iyang gahum. Kita karon nga nagakinabuhi sa TUGPAHANAN SA GRASYA, aduna usab kitay kadaugan batok sa tulo (3) ka matang sa kamatayon: (1) ang kalibutan; (2) ang unod; (3) ug sa yawa.



Tinubdan: Sweet Publishing – kini ilustrasyon lamang sa Exodo 14:24-25

Kita karon magahunahuna sa unsa nga paagi nagkapareha ang atong kasinatian niadtong mga Israelitas nga mibakwit.

Ang Egipto nagahulagway sa kalibutan, nga sa umalabut nga panahon kini pagahukman. Ang Israel naluwas pinaagi sa pagtoo gikan sa paghukom sa Egipto, pinaagi sa

dugo nga gibutang sa pultahan ug balabag sa mga balay. Kita, mga magtotoo ni Cristo, pagaluwason pinaagi sa pagtoo gikan sa paghukom nga ipahamtang niining kalibutan; pinaagi sa dugo sa Ginoong Jesu-Cristo nga gibutang sa atong mga kasingkasing.

Ang unod mao ang karaang pagkatawo nga kanunay nagapakig-away sa espirituhanong tawo. Ang mga Israelitas mikaon sa unod sa sinugba nga Karnero sa Pascua (Pass-over Lamb), aron malig-on sila alang sa ilang pagpanaw. Kita nagakaon sa buhing Cristo pinaagi sa pagtoon sa Iyang Pulong sa hustong pagkabahinbahin, aron kita makaangkon ug kusog sa atong pagpanaw niining kinabuhia. Kinahanglan kita mahinumdom kanunay nga kita, mga magtotoo ni Cristo, magasalikway sa *daang pagkatawo* uban sa pagkadautan niini. Ug nga magasul-ob kita sa *bag-ong pagkatawo*, kinsa ginabag-o sa tinuod nga kahibalo sumala sa dagway sa Nagbuhat kaniya, Colosas 3:9,10.

Si Paraon ug ang iyang kasundalohan nagabarug alang sa dautan. Maingon nga ang Israel naluwas pinaagi sa pagtoo sa mga gitudlo sa ilang pangulo nga si Moises, kinsa midawat niini gikan sa Dios. Kita usab naluwas pinaagi sa pagtoo sa ginatudlo sa atong pangulo, ang apostol nga si Pablo; kinsa midawat niini gikan sa nabanhaw nga si Ginoong Jesu-Cristo. Pinaagi sa pagtoo, kita mudaug sa gubat tali sa daan ug bag-o nga mga kinaiya nga ania sa sulod nato. Kita makaangkon sa kadaugan sa mga pagtintal ug mga pagsulay pinaagi sa pagsunod sa mga pulong ni apostol Pablo. Kondili kita mosunod sa iyang mga pulong, kita nagaalagad sa atong kaaway. Maingon man nga ang mga Israelitas wala magasunod sa mga pulong ni Moises.

Atong makita sa matag panghitabo nga ang kaluwasan sa Israel nagadepende sa pagtoo ug sa pagtuman sa Dios. Ug sa maong higayon, ang Dios mipakita sa Iyang makaluwas nga gahum. Ang atong kaluwasan gikan sa kalibutan, sa unod ug sa yawa; nagadepende sa pagtoo ug pagtuman sa pulong sa Dios. Si Cristo ang atong Karnero sa Pascua (Pass-over Lamb), gihalad alang kanato. Pinaagi sa paggamit sa Iyang giula nga dugo dinhi sa atong mga kasingkasing ug sa atong mga kinabuhi, kita mitoo ug misalig Kaniya ingon nga atong bugtong Manluluwas gikan sa impiyerno. Sa maong higayon, ang Dios mihimo sa Iyang dakung buhat sa kaluwasan.

**SAG-ULOHON NGA BERSIKULO: “Kuhaa gikan kaninyo ang daang igpatubo aron kamo mahimong bag-ong minasa; maingon nga sa pagkatinuod kamo dili na pinatuboan. Kay gikahalad na si Cristo, ang atong Karnero sa Pascua (Pass-over Lamb).” 1 Corinto 5:7.**

## PAGTULON-AN 10 – BULOHATON

Direksyon: Isulat ang hustong tubag sa mga pamahayag o pangutana.

1. Ang mga Israelitas misunod sa DALAN SA SAAD ngadto sa unsa nga nasud ?  
Exodo 1:1 \_\_\_\_\_.
2. Ngano nga ang Canaan atong gitawag nga YUTA SA SAAD? Exodo 12:25.  
\_\_\_\_\_.
3. Ilista ang napulo (10) ka mga kagul-anan nga gipadala sa Dios ngadto sa Egipto?  
Exodo 7-12.  
1) \_\_\_\_\_; 6) \_\_\_\_\_;  
2) \_\_\_\_\_; 7) \_\_\_\_\_;  
3) \_\_\_\_\_; 8) \_\_\_\_\_;  
4) \_\_\_\_\_; 9) \_\_\_\_\_;  
5) \_\_\_\_\_; 10) \_\_\_\_\_  
\_\_\_\_\_.

Ang Dios miluwas sa Iyang katawhan gikan sa tulo (3) ka matang sa kamatayon, sa dihang miikyas sila gikan sa Egipto ngadto sa yuta sa Canaan diha sa DALAN SA SAAD. Isulat kon unsa kining tulo (3) ka mga kamatayon:

4. Exodo 12:12-13 \_\_\_\_\_.
5. Exodo 14:22-23 \_\_\_\_\_.
6. Exodo 14:27-28 \_\_\_\_\_.

Kita karon mahimong maluwas gikan sa atong kaaway, kinsa buot molaglag sa atong lawas ug kalag. Aduna siyay tulo (3) ka mga paagi nga gamiton. Ang mga bersikulo sa ubos nagapasidaan kanato, pangitaa kini ug isulat sa ubos.

7. Galacia 1:4 - Si Cristo mitugyan sa Iyang kaugalingon alang sa atong mga sala aron pagluwas kanato gikan sa \_\_\_\_\_.  
Busa, si Jesu-Cristo kinahanglan mahimo nato nga atong kaugalingong Manluluwas ug Ginoo.
8. Roma 8:13 - Kon kita magakinabuhi sumala sa \_\_\_\_\_ kita mamatay. Apan kon pinaagi sa Espiritu atong gipatay ang \_\_\_\_\_, kita mabuhi.  
Busa, kinahanglan dili kita magkinabuhi diha sa unod.
9. Efeso 6:11 - Isul-ob ang tibuok hinagiban sa Dios, aron kamo makahimo pagbarug batok sa \_\_\_\_\_. Busa, kinahanglan kita magsul-ob sa tibuok hinagiban sa Dios aron kita makabarug.

10..Isullat ang 1 Corinto 5:7: \_\_\_\_\_  
\_\_\_\_\_  
\_\_\_\_\_.